

Männerriege: Jahresbericht 2024

Ski-Weekend 6.-8. Januar in der Lenzerheide



S Wätter am Schiwucheend Afang Januar isch eher dürzoge gsi, aber mir hei üs nid dervo lo abhaute d Piste i Agriff z näh. Wie i de letschte Johr hei mir Hür wieder d [Mountain Lodge](#) buechet gha. Leider isch d Fröid a däm Wucheend chli trüebt gsi, wiu d Beatrice Jäiser im Näbu unglücklech gstürzt isch u so e Schulterverletzig igfahre het. Mir hoffe das aues wieder guet verheilt isch. Natürlich het ou üses traditionelle Aperö nachem Schifahre nid dörfe fähle. U so hei mir es Plätzli am See näbem Hoteu gsuecht. Dummerwis ha i di Situation vom «gfrorne» See gfausch igeschätzt u dr Fritz ufs Wasser ungerem Schnee glockt, was zu nasse Socke gfuehrt het. Sorry Fritz u danke für d Organisation vo däm Wucheend!

Biketage 9.-11. August



Mitere stattleche Anzahl Manne u Froue u mit E-Bike hei mir üs ungerhaub vom Zürisee i de Kantön Schwyz u Glarus sportlech u kulinarisch betätiget. Gstartet u de am Schluss ou wieder acho si mir am Sihlsee. Churz druf si mir in Einsiedeln itroffe u nacheme churze Haut witer i Richtig Muotatal wo mir de üsi erschti Übernachtig aviisiert hei. Witer gange isches übere Prigel Pass zum Klöntalersee u när witer zu üsere zwöite Ungerkunft in Näfels. Dank E-Bike chöi mir ir Gruppe ou mit de verschiedene Fahrniveaus guet umgoh. U de gits öppe ou Passage wo me bim Vorbereite uf dr Charte när ungerwägs chli anders vorfingt oder nid grad weis, ob me jetz gschider links obsi am Wanderwägwisser noch s öue oder doch eher rechts düre Waudwäg fahre. U de hei mir e Wäg vorgfunge wo ufgrund vo de relativ grosse Steine

fahrtechnisch obsi doch rächt usefordend isch. Dene wos chli ringer geit häufe aube de angere wo chli kämpfe s Velo uechestosse fürse so chli z ungerstütze u am Schluss hei aube aui e guete Mix zwüsche locker ungerwägs z si u fahrtechnische u konditionelle Useforderige. Danke Fritz u Hannes für die guete Organisation i dere (für mi eher unbekante) schöne Region!

Männerriegereise 24.-25. August



Die wie üblech vom Hans Röthlisberger organisierte Reis het üs vor Engstligenalp, übere Entschligegrat i Richtig Stäghore u de schliesslech zu üserm Übernachtigsort [Lämmerehütte](#) gfuehrt. Am zwöite u letschte Tag si mir de via Daubensee de Wanderwäge no u nachere Tourstich im Restaurant Schwabenbach zu üsem Tourziel Sunnbüel glüfe, wo mir mit dr Seilbahn abe zum Bahnhof u vo dert via Zug wieder Hei grite si. Danke Hans für s Organisiere vo dere interessante Wanderig!

Schlusswort

Näbe üsem reguläre u etablierte Program si vieli vo üs ou schüsich no aktiv. Zum Bispiu si Hür wieder es paar Manne 4 Täg is Obergoms go Langlöifile. De René u i gö ou no a d Wintermeischterschaft go häufe Volleyball spiele (Hür het sech üsi Volleygruppe ufgrund vom regionale Meischterschaftssieg sogar für d SVD-Schwizermeischterschaft qualifiziert). Wie letscht Johr isch üse Turnbetrieb eher unveränderet mit Bike, Walke, Ufwärm u Chraftüebige u verschiedene polysportive Spiu wie Schutte, Unihockey, Fuschtbau. Vieli vo üs si scho ime respektable Auter u de passe mir üsi Turnstung ou chli a üsi körperlechi Verfassig a. Für s nächschte Turnerjohr wüschte i üs aune es vitals u gsungs Johr u e guete Usglich zwüsche fit blibe u kulinarischem Gnuss 😊. Dürrenroth, 7. Dezember 2024, Armin Heiniger.